

---

# *Rischer Kerbspruch 2017*

---

Isch grüße Euch, Ihr liewe Leit,  
von hier un dort, vun nah und weit,  
im schlichte Dress, im foine Zwerrn,  
ehr glaabt des nit, mir ham'n eisch gern.  
Ehr Kesselflicker, Berschtebinner,  
ehr kloane unn ehr große Kinner.  
Ehr Leit, was isses ja so schee,  
eisch alle wieder da zu seh,  
zum Kerbspruch hier in unserm Rische,  
heit wer'n mer mol des Ort uffmische.

Gastgeber is die Feierwehr,  
es sinn jo schon drei Jahre her,  
die letzte Kerb in dieser Halle.  
Es wird Euch desmol aach gefalle!

Ehr wird gleich luhren, ehr wird gleich lache,  
iwwer all die scheine Sache,  
die halt bassiert sin, in dem Ort.  
Es wor nix Schlimmes, wor koan Mord,  
doch in soam Joahr, ihr glaabt des nit,  
doo kriecht mer schon so monches mit.  
Ihr Leit, was simmer so jo froh,  
die Rischer Kerb is wirrer do!

**Lied: die Rischer Kerb is do**

Trinkt weiter, misst nit unnerbresche,  
wenn mir hier uff die Pauke dresche.

Es is jo doch ebbes passiert,  
mir hewwe des glei mitnotiert.

Wie ihr glei hört, es is was lous,  
in unsern Ort, der is nit groß.

Doch will isch Eisch jetzt gleich berichte,  
so mansche fröhliche Geschichte.

Wos do bassiert is, ihr wird's hern,  
un wen's betrifft, soll sich nid stehrn.

Oafach war's nit, de Kerbspruch schreiwe,  
dudd uff de Gasse doch kaum wos dreiwe.

Ehr dud bloß in de Bude hocke,  
steht halt mol uff, lasst's rischdisch rocke  
unn öffder aach mal auswärts geh'.

Dann kennt ihr aach im Kerbspruch steh'!

**Kameradin schenk ein,  
es muss erst mal getrunken sein.**

**Un die Musik spielt jetzt ganz froh:  
Die Rischer Kerb, die Rischer Kerb,  
die Rischer Kerb is do!**

---

## Allgemeines

---

Riche is schei, die Wertschaft blieht,  
ei, mache mer e Baugebiet!  
Im Bruch sinn Bauplätz, jeder will se,  
die Häuser schiesse wie die Pilze.  
Des Grundstück is kaum abgesteckt,  
do wird a schon des Dach gedeckt.  
Mer freue uns uff neie Leit,  
sinn aach por do vun dehne heit?  
Egal ob schwarz, weiß, welche Sort,  
Herzlich Willkommen hier im Ort!

-----

Unn nit ner dort git's neue Weesche,  
mer musste uns aach iwwerleeche,  
im Ortsbeirat, e neue Gasse,  
weil plötzlich wurd a Haus bau'n lasse,  
do wo noch nie a Stroß do waor...  
Ja, is des nit ganz wunderbar?  
Do steit zwar schunn ganz lang e Haus,  
die Leit gein nur woanners naus.  
So hat de Ortsbeirat mit Schwitze,  
misse lang zusammesitze.  
Am Ende hot er mit Bedacht  
a Stroß mit Nome ausgedacht.  
So dud der Briefträscher jetzt wisse,  
wo wer'n die Briefe oigeschmisse.

-----

Im Indernet sin mir jetzt aach,  
omol musst's kumme, gor ka Fraach.  
Mit www richen de  
kimmt selbst der greste Dabbes he.  
Dort kann mer ziemlich alles finne,

zum Ort vun vorne bis noch hinne.  
Nachrichte, Bilder un Veroine  
Dudd alles jetzt im Netz erschoine.  
Guggd eisch des oa, es is so schee,  
nächst Woch kennt ehr de Kerbspruch seh.  
Jetzt kennt ehr uff die Tasde dresche,  
koa Angst, des Indernet lässt sich nit lösche!

---

## Brandgeruch

---

Am Freidooch im Summer, die Sunn knallt' ganz gut,  
do geht mer mol weg unn e Bier drinke duut.

De Tannehof mim neie Wert,  
wird ausprobiert, sie worn zu vert.

Veel getrunge geie's Schwitze,  
Esse probiert und des wor spitze!

Paar Bierchen, Schnaps hann se donn alle,  
mim Fohrrod hoam und nit gefalle!

Korz vor Riche duut es stinge,  
kennt laie aach am veele Trinke.

Es richt e bissje wie verbrennt.

Do hot halt oaner nur verpennt,  
zu drehe uff'm Grill die Worschd.

Die Vier foahrn weider, hewwe Dorschd!

Mer kehrt donn oi, bei oam im Garde,  
es werd so langsam kiehl im Schadde.

Es iss schun spät, es nimmt so in Lauf,  
do geit de erste Piepser auf.

Dann stimme ganz veel onnern inn,  
weil alle Nachbern Blauröck sinn.

Aus alle Richtung ougeschosse,  
die Schloafauzisch noch ougelosse,

renne se fort, die Hei enunner,  
es brennt ja wo, des is koa Wunner.

Im Piepser stand der wischdisch Spruch:  
„Hoffeldweg, unbekannter Brandgeruch“!

Die Feuerwehr mit Mann unn Maus  
rückt dann Rischdung Althoim aus.

Am Feldroand sind se oangekumme  
und wurde in Empfang genumme,

vun veele Leit- mei wie genug-

in Unnerhos unn Schlafouzug.  
Des is ne alles nit geheur,  
mer riecht zwar wos, doch sieht koa Feuer.  
Es wird gerätselt unn gesucht,  
es brennt doch woa, ´s is wie verflucht.  
Bis oaner merkt -unn der war schlau-  
De Bäcker heizt de Ofe ou!  
Es iss halt sou, bei soa oam Ofe,  
muss Riche halt mol stingisch schlofe.  
Macht koa Geschiss unn duuds verbreite,  
de Notruf drigge, doats vermeide!  
Dass aach die Oigeplackte wisse,  
wonn se de Notruf drigge misse!  
Sunst muss bei jedem tiefe Druck  
die Feuerwehr enaus ruck-zuck.

**Kameradin schenk ein,  
es muss erst mal getrunken sein.**

**Lied: Hurra, hurra, die Feuerwehr ist da!**

---

## *Bachunfall*

---

Des Winzerfest is immer gud,  
dass oaner dabbisch falle duht.  
Am Weesch gleisch durch es Viadukt,  
die Brennessel hown oan gejuckt.  
Drum wurden sie schnell abgemäht,  
damit koa Griezeisch dort noch steht.  
Der freie Weg wurd zum Verhängnis,  
bracht er nen Kläaschder in Bedrängnis.  
Der gude Mann, nitt mei gonz wach,  
kriescht nit die Kurv, liegt in de Bach.  
Zum Glick zwaa Richer gein vorbei  
und hörn Gejammer und Geschrei  
vun dem, der dutt do unne liesche.  
Soll oaner jetzt do nunner kriesche?  
Ach no, des is jo doch zu schwer,  
drum rufe se die Feierwehr.  
Die kumme donn mit veele Leit,  
sogar de Notarzt steht bereit.  
Sie helfe gern, die blaue Kittel,  
probiern duhn ses mit alle Mittel,  
doch der im Bach is nit mehr fit  
un macht oafach nid rischdisch mit.  
Drum muss de Max bis on die Knie  
ennunner in die dreggisch Brie  
und schiebt en nuff, vum Wasser weg.  
Doo leit er donn mit Dreck un Speck.  
Des Unglick is noch nit vorbei,  
gerettet ja, doch eieiei,  
do kimmt die Tochter oagerennt,

und hat de Vadder ausgeschennt.  
Drum merkt euch oans, wann ihr mal laaft:  
Wer zu viel trinkt, der wird bestraft!  
Werd nass unn meisdens auch noch dreggisch  
unn die Familie macht disch scheggisch.  
So fahrt mim Taxi orrer Bus,  
dann nimmt des aach en guude Schluss!

**Kameradin schenk ein,  
es muss erst mal getrunken sein.**

**Lied: Trink, trink Brüderlein trink**



---

## Mauer

---

Vor viele Joahr, als des Feuerwehrhaus entstand,  
do word viel gemauschelt, do word viel geplant.  
Do is aach gebaut worrn, wie's nit wor im Plan,  
doch all worrn zufriede und dodruff kimmts an.  
Nä heit git's Probleme un des is nit schei.  
Die Mauer steit do, wo se derf gor nit stei.  
Dann ginge die Beschwerde erst rischdisch los,  
weil die Kinner druffsitze in de Feuerwehrhos.  
Do denkt mer sich, des mecht doch nix...  
De Nochber is ähbschd un dengt sich goanz fix:  
„Wie könnt mer verhinnern, de Kinner ehr Bosse?  
Mach Bockfett druff, do werrn ses schon losse.“  
Nä oans is wischdisch und des wollt er nit seh,  
„soi“ Mauer dutt nit uff seim Grundstück druff steh.  
Unn donn noch beim Einsatz de Fahrer wohl pennt  
und mit Fahrzeisch die Mauer am Eck schei eirent.  
Es Gezeter war groß, es gab viel Geschrei,  
sogar die Versicherung wor mit debei.  
Am Ende macht se äwwer nit mit,  
weil do wo se steit, es die Mauer nit gitt.  
Nadirlich fand de Nochber des doof,  
baut die nei Mauer donn im eischene Hof!  
Do steiht se, wo se schun immer sollt stei,  
woarscheinlich kann mer so vum All aus sai...

**Kameradin schenk ein,  
es muss erst mal getrunken sein.**

**Lied: Niemand hat die Absicht, eine Mauer zu bauen**

---

## Schildkröte

---

So manche Mensche dann und wann,  
die misse an des Häuschje dran.  
Verschönern, des ist so en Brauch  
die wolle des und dun's dann auch.  
E Schmuckstick isses in de Gasse,  
doch sou wie's is kann mer's nit lasse.  
Sou rischdisch weiß is' lang nit mehr,  
drum muss en Weissbinner jetzt her.  
Alles is gut, sou denke mir,  
doch rennt die Fraa gleich zum Polier  
damit der unners Door ganz gut  
en kloane Balke leie duht.  
Die Schildkröt, die im Teich dut sitze,  
ansonste deht durch's Örtsche flitze.  
Der macht's sofort, en brave Kerl,  
de Moaster hert's, verschwind gonz schnell.  
Drei Doch, drei Nächte, alles klor,  
de Balke leit jo unnerm Door.  
Vergisst es dann am Tache Vier,  
un fortgerennt, des wilde Tier.

Die Hauptstroß läaft se nuf un runner,  
do kimmt a Audo mit Gedunner.  
Er sieht se äwwer , was a Glick,  
bremst grad noch runner, un e Stick  
vor de Schilda bleibt er stäi.  
Soweit so gut, doch jetzt wohei  
mit der Amphibie, -goldisch isse-!  
Doch wird die oaner bald vermisse.  
Die Fraa im Sozius rift schnell oa,  
ehr Freundin geit aach gonz schnell droa

und rät der Fraa, ´s wird immer krasser,  
„die Schildkröt muss ganz schnell ins Wasser“.

Was macht se jetzt, die arme Frau?

Sie schmeisst die Schilda in die Au.

Un so, ja des is jetzt koa Wunner  
geit die kloa Krott erst mol schei unner.  
Nit long denooch, plötzlich ganz wendig,  
do taucht se uff ganz quicklebendig  
unn freut sich iwwer ihr Revier,  
es is halt doch a Wassertier!

So schwimmt se rim, en Doach, a Woch,  
jetzt denkt sich die Familie doch,  
mer mist se fange un hoambringe,  
mehr kenne eisch a Lied vun singe.

Was des fer´n Kampf war, Tier und Mann,  
die lässt den koa zwaa Meter ran!

Mit Stiefel, nuff bis unner´s Kinn,

hippt er in de Fischteisch nin,

dann taucht se ab un dudd verschwinne.

Wie soll´ mer die im Teich drin finne?

So langsam wird des alle bang,  
es wird bol kalt, s´ is nit mer long.

Des Vieh braucht Fudder fer soin Speck  
zum Winderschlof unner de Heck.

Probiert wird´s weider ohne Hetz,  
mit ebbes Glick geit sie ins Netz.

**Kameradin schenk ein,  
es muss erst mal getrunken sein.**

**Lied: Lotti Song**

---

## Sommerfest

---

Bei uns am Teich des Sommerfest,  
sich keiner gern entgehen lässt.  
Am Samstag Owend spielt e Band,  
un rockt die Pardie bis zum End.  
Bis mojens frieh im Cocktailzelt  
so mancher moahnt, ehr wer de Held.  
Am Sunndoch dann kummt uff de Disch  
de Spießbrode, ganz herrlich frisch.  
Do werd erst in die Kersch gegange  
und dann steit mer beim Esse Schlange.

Doch diesmal sollt' es anners kumme.  
De Bäcker hat sich's vorgenommen,  
am Awend frieher homzugei...  
Doch war's im Cocktailzelt zu schei.  
Am Mojend donn, noch in de Deck,  
vergesse sinn die hunnert Weck!  
Sie rufen oa, normal, mim Handy,  
er hert es nitt, de Rischer Dandy!  
De Jens mim Bussje nuffgerennt,  
wollt gugge, ob de Bäcker pennt.  
Er klobbt, hacht uff die Klingel druff,  
doch moanste, do macht oaner uff?  
Was is blos los, was is passiert?  
Das der sich jo so garnit rieht?  
An onnern Bäcker hot zum Glick  
jo a noch Wegg, die hunnert Stick.  
Unn weil vorm Stand die Schlange steht,  
holt mer die dort, dass` weitergeht!  
Beim Nochdisch dann, do rift es ou,  
de Bäcker is tatsächlich drou.

Soin Daach versaut, ja des is klor,  
weil er OAMOL de Letzte woar!

**Kameradin schenk ein,  
es muss erst mal getrunken sein.**

**Lied: Backe backe Kuchen**

---

## *Backesfest*

---

Letzt Woch wor's, no, wer's gewese,  
gestanne hädde mer am Trese  
vum Backesfest, mit Weck, Worscht, Woi.  
Doch hatt des halt nit solle sei!  
Familie git's, ehr glaabt des nit,  
die mache allees mitanonner mit.  
Beim Knoche breche unn beim Falle,  
wonn's oaner macht, donn makes alle.  
Unn weil die halt ganz wischdisch sinn,  
wor's Backesfest desjohr nit drin.  
Der Radiuskopf, en kloane Knoche,  
is vor drei Joahr bei ihr gebroche.  
Unn desjoahr, ja, wenn ich's eich saach,  
hippt er vum Rad und macht's ihr nach.  
Zwaa Hunde häwwe rumgedollt  
unn er is gradwegs noigerollt.  
Un wie er so am Bode laach,  
die Knoch kaputt, die nei Brill aach,  
wor's Backesfest vorbei fer all'.  
Wos lerne mir aus so em Fall?  
Es Ort braucht mei und junge Leit,  
die aach zum Schaffe sinn bereit,  
die helfe, plane und mitmache  
beim Backesfest un oannern Sache.  
Mer sinn oan Ort, mer wolle Feste,  
drum packt all oa unn gebt des Beste!

**Kameradin schenk ein,  
es muss erst mal getrunken sein.**

**Lied: Ja, wir sin mim Radel da**

---

## *Epilog*

---

Wos uns're Rischer so getriewe  
im Ort un aach bei ihre Liewe,  
bei Doach, bei Nacht un in de Frieh'  
notierde mir - nit ohne Mieh'!  
Es gab noch mei verriggde Sache;  
die meiste worn zum Glick zum Lache.  
Isch losses äwwer, glaabd es mir,  
sunst schdein mer noch heit Owend hier.  
Benemmt eisch gud im nächsde Johr,  
sunst werded ehr - des ist jo klor -  
im nächsde Kerbspruch drinne stei.  
Kann soi, ihr find des donn nit schei...  
Der Job vun uns, so duhn mer walde,  
is, eier Sünde festzuhalde!  
Ob Katastrophe, ob Skandal,  
des is fer uns grad gonz egal!  
Es war mal widder wunderbar!  
Mer freue uns uff nächsdes Jahr!  
Lasst uns zum Schluss des Glas erhebe:  
Die Kerb in Riche, sie soll lebe!

Und wenn das Glas jetzt nicht zerbricht,  
dann taugt die ganze Kirchweih nicht!